

կրկնվելը: Նման ըմբռնումները մեծ մասամբ մնացուկներ էին ամենանախանական հասարակական մտածողության, որի համաձայն մահացածների հոգիները դեռևս չեն անջատված մի այլ աշխարհ՝ այս աշխարհից չեն կտրված և դեռ ապրում են կենդանի մնացողների հետ ընդհանուր, անբաժան կյանքով: Այստեղ մարդն ու ննջեցյալները պահպանում էին իրար հետ մշտական կապ: Այն նախնական աշխարհայացքը, Լեվի Բրյուլը անվանում է միստիկ⁹⁵, իսկ անգլիական սոցիոլոգները, օրինակ՝ Marrett-ը և անիմատիստիկ, տարբերելով ավելի ուշ շրջանի աշխարհայացքից՝ անիմիզմից, երբ արդեն ննջեցյալների հոգիները ստանում էին անկախ գոյություն և նրանց ղեկավարում էին մարդկային աշխարհից տարբեր հատուկ աշխարհում:

Այն, որ հոգիները կապված են մնում առավելապես իրենց հարադատների և համայնքի հետ, ավանդաբար անցել է ավելի ուշ, արդեն տոհմատիրական ժամանակներին, երբ տոհմի գաղափարով ընդգրկվում էին և՛ կենդանի, և՛ հանգուցյալ արյունակիցները. սկիզբ է դրվում նախնիների պաշտամունքին: Ավելի ուշ, հասարակական շերտավորման զարգացման հետ անբաժանելի կապակցությամբ ծագում է այն հավատալիքը, թե բոլոր մարդկանց հոգիները միասին չեն հեռանում միևնույն աշխարհ՝ սպորերկրյա կամ վերերկրյա⁹⁶, այլ այդ աշխարհում տարբերություն է դրվում ննջեցյալների մեջ, նայած այս աշխարհում վարած կյանքին և մահվան հանգամանքներին: Զանգեզուրցի հայի աշխարհըմբռնման մեջ միստիկ կամ անիմատիստիկ հասկացողության հետ միահյուսված է և այս վերջին պատկերավորումը՝ ըստ կյանքում ունեցած վարքագծի տեղաբաշխվելը մյուս աշխարհում: Ինքնասպաններին տեղ չէ տրվում ընդհանուր հանգստարանում և նրանց հոգիները շարունակ անհանգիստ էին և շրջում էին դառնացած և ոխակալ: Ինքնասպան հոգուց պետք էր սպասել շարություն, դժբախտություն և անհաջողություն: Բռնի մահով սպանվածների կամ կայծակնահար, նաև անհաղորդ մեռածների հոգիներն էլ կարծես թե մյուսներից անջատված էին համարվում և դեռ բոլորովին այլ աշխարհ շտեղափոխված⁹⁷, վերջնականապես գերեզմանից չանջատված վախով և առհասարակ այլևայլ հիվանդություններով բռնվածներին, այդպիսի ննջեցյալի գերեզմանաքարի փոսիկից կամ գերեզմանաքարի վրա դրած ամանից ջուր էին վերցնում, ինչպես վերը նշեցինք, նրանով վախն ու հիվանդությունը վանում՝ թաղվածի հոգուն էին հանձնում:

Զանգեզուրցի հայերի մեջ քրիստոնեական գաղափարախոսության ազդեցության ներքո կերտվել է նաև այն հասկացողությունը, որ մյուս աշխարհ անցնելիս, մահել կամուրջի օգնությամբ, հոգիները ենթարկվում էին մի տեսակ բարոյական քննության: Մեղքերից թեթև հոգիները դյուրին էին անցնում կամուրջով մյուս կողմը՝ դրախտ. մեղքերով ծանրաբեռնվածների ոտքի տակ մահել կամուրջը կտրվում էր և նրանք ընկնում էին հավիտենական տանջանք:

⁹⁵ Леви-Брюль Л. П., Первобытное мышление, 1930, «Атеист», էջ 261 և հետև.:

⁹⁶ Գուցե այսպիսի անխոր բոլոր հոգիների աշխարհն էր (համտ. հույների հանդերձյալ ստորերկրյա աշխարհը)՝ հին գրականության մեջ հիշատակվող Սանդարամետի անդունդի՝ դժոխքի ծոցի ստորերկրյա վայրի, երկրի խորքի մեջ: Բայց մեզ ստույգ հայտնի չէ, բաժանվո՞ւմ էր արդյոք նա երկու մասի՝ մեղավորների համար՝ դժոխք, արդարների համար՝ դրախտ:

⁹⁷ Օրինակ՝ ըստ Բախաու (Կենտրոնական Բոռնեո) ցեղի կարծիքի բռնի մահով մեռածները արի բաթակ բերանի հաստություն ունեցող կամուրջին դեռ չհասած և նրա վրայով դեռ չանցած՝ անջատվում են մյուս հոգիներից և հեռանում մի այլ վայր՝ (Харузина В., Этнография, т. I, էջ 412):